



Guarda è vegni undrà l'onn 1975 cun il Premi Wakker per il mantegniment dal maletg dal vitg engiadinais.



Il 1998 è la vischnanca lumneziana da Vrin vegnida distinguida cun il Premi Wakker.

FOTOS SOMEDIA/JAKOB MENOLFI

Da Guarda a Vrin – 50 onns Premi Wakker

Quest onn festivescha il Premi Wakker, che vegn surdà mintg'onn da la Lia svizra per la protecziun da la patria, ses 50avel anniversari. A Meyrin en il chantun Genevra, ha gi lieu la sonda vargada la surdada da giubileum dal premi Wakker. La Lia svizra per la protecziun da la patria festivescha il giubileum da «l'Oscar da la cultura da bajegiar svizra» cun ina retrospectiva e cun in sguard en il futur.

MARTIN GABRIEL/FMR

Per l'emprima giada è il Premi Wakker vegni pussibilità l'onn 1972 tras in legat da l'um da fatschenta genevrin *Henri-Louis Wakker*. Dapi lura ha la Lia svizra per la protecziun da la patria survegnì ulteriurs legats. Grazia a quels po ella surdar il premi enfin oz. Cun ussa totalmain 51 purtaders dal titel è il circol da las vischnancas u instituziuns premiadas in circol cun ina noda-chasa speziala.

Il pli savens a vischnancas

Il Premi Wakker vegn surdà mintg'onn ad ina vischnanca politica u en cas excepziunals ad ina organizaziun u ad in'unium. La summa dal premi da 20 000 francs è da caracter plitost simbolic. La valur da la distincziun è dentant ina renconuschientscha publica en connex cun ina prestaziun exemplarica sin il sector da la construcziun u da la planisaziun. Il premi è ultra da quai in argument per survegnir daners da promoziun sin plaun chantunal e federal.

Prestaziuns spezialas concernet il maletg dal lieu

Il Premi Wakker distingua vischnancas cun prestaziuns spezialas concernet il svilup dal maletg dal lieu e da l'abitadi. Latiers tutgan

oravant tut la promoziun da la qualitat concepziunala tar edifizis novs, in bun tractament da la substanza architectonica istorica, sco er ina planisaziun locala exemplarica che tegna quint dals interess da l'ambient.

Nagina concorrenza da bellezza

Oz n'è il Premi Wakker insumma nagina concorrenza da bellezza pli. Dapi l'onn 2019 è *Stefan Kunz* manader da fatschenta da la Lia svizra per la protecziun da la patria. El ha ditg ch'ins na premieschia oz betg pli simplamain quai che fetschia ina cumparsa sco en il cudesch da maletgs. Premià vegnia il vegl ed il nov che s'accordeschan in cun l'auter. Ils criteris per la premiaziun sajan restads ils medems sur ils decennis, ha Stefan Kunz accentuà. Sa midadas sajan percenter las sfidas. Cun l'augment da la populaziun en Svizra sajan ils conturns ed ils accents socials sa midads.

Guarda è stà l'emprim lieu en il Grischun

Enfin oz han tschintg lieus ed in project dal Grischun obtegnì il Premi Wakker (guarda boxa). Il vitg da Guarda en l'Engiadina Bassa è vegni distingui l'onn 1975 cun il Premi Wakker. Da la retschertga da persunas involvidas da quest temp a Guarda resorta che la surdada dal premi sto esser stada ina gronda

fiesta dal vitg cun blers oratur prominentes da la regenza grischuna fin a la Lia svizra per la protecziun da la patria. La surdada dal premi a la vischnanca da Guarda saja d'attribuir fermamain a l'engaschi da l'anterior architect e politicher Jachen Ulrich Kőnz da Guarda. Sias stentas per la planisaziun locala dal vitg ed il mantegniment dal maletg dal lieu da Guarda sajan daventads in mussavia er per autras vischnancas. W. von Hoven era president communal da Guarda l'onn 1975. Ina fotografia en la revista da la Lia svizra per la protecziun da la patria da l'onn 1975 mussa la surdada dal Premi Wakker a Guarda. Entant che Guarda ha anc survegnì il Premi Wakker per il mantegniment da la fatscha dal vitg ha la surdada a Vrin – 23 onns pli tard – gi lieu tenor auters criteris.

Ils premis «grischuns»

1975	Guarda
1995	Spleia
1998	Vrin
2010	Fläsch
2015	Bregaglia
2018	Nova Fundaziun Origen

«Ils vitgs èn en ina fasa delicata»

La surdada dal Premi Wakker sa repeta mintg'onn en in auter lieu. Tge ha purtà e tge porta la surdada d'in tal premi. La FMR ha discurrì cun l'architect e professor Gion A. Caminada da Vrin.

MARTIN GABRIEL/FMR

Sia ovra la pli enconuscenta en vischnanca è la stiva da morts ch'è vegnida creada e construida da l'architect *Gion A. Caminada* tranter 1996 e 2002 sper la baselgia. La vischnanca da Vrin era vegnida undrada l'onn 1998 cun il Premi Wakker – era causa sias lavurs.

FMR: Tge porta il Premi Wakker?

Gion A. Caminada: Il Premi Wakker vegn surdà per ina prestaziun e sensibilisescha per la furmaziun da vitgs e citads. Il premi fa senn pli che insicura.

Na stuess ina tal premi betg esser pli giagliard u avantgardistic en il temp dad oz?

Vrin aveva survegnì il Premi Wakker per il svilup da novs objects e betg per mantegnair in maletg. Vrin è oravant tut vegni distingui per l'integrasiun d'objects agriculs en il vitg ed en las fracziuns. Architectura è bler dapli che be maletgs. Da quai èn ins pli e pli conscient. Il svilup producescha ils maletgs da



damaun. L'organizaziun che surdat il premi sto da cas tar cas decider tge ch'è impurtant. Tranter salvar l'idilla ed in project avantgardistic datti in grond spazi.

Vrin ha survegnì il Premi Wakker avant 24 onns. Tge è restà?

Tar la surdada era vegni confermà ch'il svilup da Vrin sa movia en ina direcziun

interessanta. Dapi lura è dentant bler sa midà. Autras furmas da viver e da lavurar èn s'establidas. La tenuta è dentant restada. L'omogenitad dal vitg e dals aclaus è anc qua. Igl è pussaivel ch'il premi haja gi in effect.

I dovra damai in premi per chattar l'identitad?

Ils vitgs èn en general en ina fasa delicata. I manca savens la segirtad co agir. I dat tenuetas che s'orienteschan mo envers il passà. Lura datti talas che s'orienteschan mo envers l'avegnir. La segirtad chatt'ins dentant mo en il preschent. Il focus dal svilup e da la furmaziun sto esser drizzà sin quai che dat la forza al lieu. Las chaussas novas duain esser autras, quai dentant betg a donn e cust da quai che dat al lieu sia atgnadad ed a la fin finala sia identitad. Identitad vul dir: quai tutga tar mai. Quai è in basegn uman, oz pli che insicura. En questa direcziun ha Vrin lavurà intensivamain avant e suenter la surdada dal premi Wakker. Jau hai in bun sentiment.